

nicht gleycher höhe ist / sonder hinten weyter / höher dann vornen / vmb das Rohr herum / welches innerhalb durch auß / in gleycher höhe sein muß.

So nun der Büchsenmeister sein absähen durch die beyde spizlin / solcher beyder absähen / nach der Auglini / grad auff den puncten gerichtet / den er treffen wil / wirdt er allzeyt ein wenig darunder anreffen / vnder solcher abzielung / vnd je weiter zu dem abgezielten puncten ist / je niedriger er treffen wirdt / vnd dargegen widerumb je neher dasselbig ziel der Büchsen / je weniger solcher Schuß vnder sich gehn wirdt / aber solchs wirdt gar augenscheinlichen gemerckt / vnnnd in grosser Differenz gefunden / so das hinderst absähen vil niedriger sein wurde / oder fürher dann das vorder / vnnnd sol aber solcher niedrigkeit / oder fürhe / auch nach der tieffe des Rohrs innwendig vnnnd nit außwendig (wie gesagt ist) gemessen vnnnd verstanden werden.

Darmit aber solchs verständlicher sey / wirst du in diser Figur zu klarem verstand vnnnd exempel sehen / wie es sol verstanden werden / auff welcher die beyde absähen der Büchsen verzeichnet ist / so wil ich zu rechtem verstand setzen / das beyde absähen / in gleycher höhe sind / oder in gleycher weyte / oder Distanz stehend / von der inneren höhe des Rohrs / vnnnd sind die beyde absähen gericht auff den fürgenommenen puncten welchen wir dardurch abgesehen haben / dahin zuschiessen / das alzeyt in solchem absähen der Schuß alzeyt niderer gahn werde / vnd vnderhalb solchem gemercktem ziel treffen / es sey gleych solches ziel nahe oder weyt / von der Büchsen / dann die Linien des Gesichts / erstreckt sich alle zeyt grad nach der Schnür / in gleycher weyte / in die ganz ferne der Linien / so nach der lenge der höhe des Rohrs / innerhalb erstreckt wirdt / oder auß dem Centro der Büchsen gezogen / vnnnd wollen wir zu klarem vricht vnd besserem verstand / dise Linien in volgendem Capitel in der Figur zusehen / verzeichnet ist / so nun von noht wegen der punct niedriger sein muß dann der puncten darauff ziellet ist /

Ⓔ